

50



JUNGI GARDE
JUNTERESSLI

FASNACHT 2022

Goldigi Hochzyt

50 Joor ghyyrootte mit der Frau
Fasnacht

Vor 50 Joor hänn mir gsait Joo
und ys uff e Ee yygloo.

Mit der Frau Fasnacht, das isch glaar,
die Bescht, wo s git, s isch wunderbar.

Als glaini Gruppe hänn mir gstaartet,
niemer het do vvyll erwartet.

Vier Piccolo und nur ai Drummle,
hesch gligglig gsee duur d Gasse bummle.

Vornedraa der stolz Majoor -
das isch d Fasnacht gsi s erschte Joor.
Drei vo dääne, no hit erhalte,
doch - kasch s eraane - jetzt bi de Alte.

D Gruppe vo de junge Resser,
duur ai Uffruef wird sii scho gresser.
liber Hundert - bald wird s gsellig,
hit isch daas e Wunschvorstellig.

Hit muesch nääb Game, Schuel und
Schutte,
aggtiv syy, sunscht ziesch e Schnutte.
Mir blyybe draa und kämpfe fescht,
Fasnacht mache blybt doch s Bescht.

Mir wänn in dääre Ee brilliere,
die Ee so gligglig wyterfiere.
Drum finde mir es blybt derbyy,
s isch s beschte Hobby - doo am Ryy.

Bi uns gseesch – es spiilt kai Rolle,
d Liebi zwische uns isch s Tolle.
Ob Pierrot, Blätzli, jeedem wie s gfalli,
syt 50 Joor scho d Ee fir alli.

Au in der allerbeschte Ee,
duesch laider Stryttigkaite gsee.
Doch strytte mir au no so gwaltig,
s het nie glänggt fir e Glyggespaltig.

Mir heebe zämme, wie s muess syy,
iiberlääbe au e Pandemyy.
Hänn fescht draa glaubt, ys nit verloore,
gnau so wie in de letschte Joore.

Zue däm goldige Hochzytsfescht,
schänggt ys d Frau Fasnacht s Allerbescht,
kurz vor gnapp, isch es jetzt glaar,
mir mache Fasnacht – wunderbar.

Ruessendi, goldigi Harlekyyn,
Pierrot in Gold, pfyffe fyyn.
Der Major als Brütigam sait barsch:
Jubel-Fasnacht, voorwärts Marsch.

Mir blatze vor Stolz, mir kenne s nit fasse,
syt 50 Joor zien mir scho duur d Gasse.
Und ändlig, s isch der greeschti Sääge,
jubiliere mir im Röpplirääge.

E Ruggbligglg sait aifach: scheen isch s gsii,
Merci Frau Fasnacht, mir liebe dii!

Mechtsch aafoo Pfyffe oder Drummle,
bisch mindischdens 7 Joor alt und hesch
Luscht zem sälber Fasnacht mache? So
mäld dy lieber hit als morn bi unserem
Obmaa, em Nicolas Bringolf
nicolas.bringolf@gmail.com oder kumm
diräggt an s Yschriibe vom 26. Meerz
2022, 10:00 bis 12:00 zu uns in Käller an
der Drohtzugstroos 69.
Mir freuen ys uff Dii!